



Ioannes Stabius foelicissimo ingenio fuit præditus. Itaq; in omni genere literarum se exercuit, & in primis Poeticæ, Mathematicæ, Medicinæ, & Historiæ operam dedit. In ijs etiam adeo profecit, ut cum doctissimis uiris conferretur. Id cum Maximilianus Cæsar percepisset, eum per Ioannem Cuspinianum anno millesimo quingentesimo secundo in celebri Viennensi Academia Poetam laureatū constituit et suum Historicum elegit. Vt ergo Ioannes se gratum declararet, Habsburgensem familiam suis scriptis plurimum illustrauit, & res Austriacas abstrusas patefecit. Postea quoq; Mathematices studium plurimum auxit & adiuuit. Nā Horoscopiō

uniuersale lineis heliis, item aliud lineis columnaribus confecit, pari ratione multa alia scripta posteritat reliquit. Vt Instrumentum ascendentis cum domibus & stellis fixis, ad diuersas eleuationes. Instrumentum horometrum ad omnia climata cum uario usu. Compositionem metroscopij, pro accipiēda longitudine ciuitatis ignota, compendiosiori uia quàm Ptolomæus habet. Compositiones uariarum projectionum uniuersalium Ptolomæi pro toto globo. Varias chartas chorographicas, propria peregrinationis illustratione depictas. Descriptionem uariorum modorum pingendi tabulas Cosmographiæ Ptolomæi, ex ueris principijs artis picturæ. Modum distantias miliariorum inter diuersa loca uarijs instrumentis mensurandi. Modum constituendi tabulas Cosmographiæ, quo tam ab uno loco, quàm à diuersis, ad diuersa loca distantia miliariorum ritè inueniatur. Constitutionem tabulæ cosmographiæ, sub quo gradu signi, & cuius planetæ dominio quæuis habitatio sit subiecta. Modum faciendi horologium lunare ad quamcunq; eleuationem & superficiem in lineis heliis. scripsit & alia plura Mathematica, & quædam carmine, quædā prosa, quibus ingenij sui acumen abundè satis posteritati declarauit. Cum hoc modo Stabius magnam uirtutis opinionem sibi conciliaffet, & Viennensem scholam plurimum exornasset, tandem obiit, & honestam sepulturam meruit. Con. Ges. in Bibliothecæ, Vu. Lazius.